



Messadi davart la radunanza communal digls 17 da zarcladour 2016

Stimadas votantas, stimos votants

Suandontamaintg az infurmainsa dallas tractandas, tgi vignan discutadas e deliberadas a caschung dalla radunanza communal digls 17 da zarcladour 2016.

Protocol dalla radunanza communal digls 18 da mars 2016

Igl protocol ò savia neir retratg u piglia invista digl 1. d'avregl 2016 anfignen igls 30 d'avregl 2016, durant 30 deis an canzleia communal. Durant igl termin d'exposiziun èn antradas nignas protestas. Igl protocol vign damai declaro per approvo e vign sottascetg digl mastral e digl canzlist.

Lescha dall'utilisaziun dalla reit e dalla furniziun d'energeia electrica

Chella lescha vala per l'utilisaziun dalla reit e per la furniziun d'energeia electrica dalla reit da distribuziun dall'interpresa da provedimaint d'electricitad (IPE/EVU) «EV Albula/Alvra», agls consuments finals scu er agls pproprietaris d'installaziuns electricas da tensiun bassa, tgi èn colliias directamaintg cun la reit da distribuziun dalla IPE. Per la constataziun digl consum d'energeia èn decisivas las indicaziuns digls chintaders e digls indrezs da misiraziun. Las taxas, tariffas, disposiziuns da restituziun, preteisas tecnicas applitgabras, scu er las contribuziuns d'attatg vignan fixadas mintg'onn dalla suprastanza communal ainten las agiuntas correspondentas. Las cundiziuns da furniziun e las prescripziuns e taxas tgi sa basan sen chella lescha, son neir midadas da tot taimp dalla IPE. Midadas essenzialas vignan communiteidas agls clients e publitgeidas aint igl organ da publicaziun uffizial. Chella lescha è sottamessa agl referendum facultativ. La suprastanza communal fixescha igl termin d'antrada an vigour da chella lescha.

Lescha digls lungatg uffizials digl cumejn Albula/Alvra

Art. 5 alinea 1 constituziun communal Albula/Alvra

«Scu lungatgs uffizials e da scola an tgossas communalas, valan an senn dalla lescha da lungatgs cantunala igl lungatg rumantsch ed igl lungatg tudestg». La lescha digls lungatgs uffizials digl cumejn Albula/Alvra, regla igl adiever digls lungatgs uffizials rumantsch e tudestg tras las autoritads communalas e l'administraziun. Dallas radunanzas communalas, an suprastanza ed an cumischungs pon igls lungatgs uffizials neir duvros libramaintg. Igl protocol dalla radunanza communal, dalla suprastanza, dall'administraziun scu er dalla cumischungs, vignan scretgs per regla an en lungatg uffizial. Tot las publicaziuns impurtantas, p.ex. constituziun, leschas, ordinaziuns, etc., vignan publitgeidas da prancepi an tots dus lungatgs uffizials. Chella lescha è sottamessa agl referendum facultativ. La suprastanza communal fixescha igl termin d'antrada an vigour da chella lescha.

Lescha da promoziun digl lungatg rumantsch digl cumegn

La lescha da promoziun digl lungatg rumantsch digl cumegn Albula/Alvra, regla las maseiras per igl mantignamaint e la promoziun digl lungatg rumantsch aint igl cumegn Albula/Alvra, scu er la collaboraziun cun otras corporaziuns digl dretg public ed organisaziuns privatas. Igl cumegn paia contribuziuns tgi sa repetan mintg'onn ad organisaziuns privatas cun la fegnamaira da promover e mantigneir igl lungatg e la cultura rumantscha. Igl cumegn sustigna la promoziun dallas cunaschientschas rumantschas digl sies persunal, scu er da persungas tgi on dimora aint igl cumegn, an lour stentas d'amprender rumantsch. Chella lescha è sottomessa agl referendum facultativ. La suprastanza communal fixescha igl termin d'antrada an vigour da chella lescha.

Lescha digls deis da pôss publics digl cumegn Albula/Alvra

Chella lescha fixescha igls deis da pôss publics e regla igl schurmetg digl pôss public durant chels deis. Prescripziuns divergentas e complementaras ainten la legislaziun federala e cantunala restan resalvadas. Deis da pôss publics èn: las dumengias, igls firos Bumang, Venderde sontg, Glindesde-Pasca, Anzainsas, Glindesde-Tschuntgesmas, Festa naziunala, Nadal e son Stefan. Scu ots firos valan Venderde sontg, Pasca, Tschuntgesmas, Rogaziun federala e Nadal. Scu firos catolics locals valan Nossadonna d'avost (15 d'avost) e Numna-sontga (1. da november). Chella lescha è sottomessa agl referendum facultativ. La suprastanza communal fixescha igl termin d'antrada an vigour da chella lescha.

Casti, igls 23 da matg 2016

La suprastanza digl
cumegn Albula/Alvra